


En memoria dil defunct

## Gion Battesta Peder, Tschamut/Tujetsch

Il preziau defunct ei naschiu a Tschamut ils 17 d'avrel 1904. El fuva il secund affon da quater fargliuns (ina buoba e treis buobs) dils geniturs Gion Battesta e Maria Victoria, nascida Riedi. Gia en tgina spetgavan las cruschs. Igl onn 1909 piarda il preziau defunct sia cara mumma. El veva 5 onns. 1917 va era il bab tier Niessegner. Cun 13 onns veva Gion Battesta ni bab ni mumma. Da quels onns deva ei ton sco negin agid. Ins sa cumprender tgei paupra sort che quels orfans han giu. Baul han els stuiu sentir la direzia dalla veta.

Il bien tat e la buna tatta, Gion Giuseppe e Culastia, han giu quitau dils orfans, e quei tochen ch'els ein i a scola. Quella han els frequentau egl institut a Schluuin, menaus lu dallas soras dominicanas da Glion. 1923 ein



ils fargliuns turnai a Tschamut en casa paterna e fatg leu il pur. Gion Battesta mava denteren silla fadigia che era scarta da lezs onns. Era eis el staus bia fumegl en Tumliasca. Aschia ein ils onns vargai. Dis propri suleglivs ha ei buca dau biars ella veta da Gion Battesta. Adina stueva el esser denter glieud jastra. Tgei che quei vul dir, san mo quels che han empruau quei.

S'avanzaus els onns dalla pensiun, eis el serendius a Mustér en Casa sogn Gions. Gia suenter dus onns han ins eregiu a Tujetsch – en sia patria – ina semeglionta casa per nos cars vegls, numnadamein la «Casa sogn Vigeli». Cheu era el da casa. Ed ins ha fatg bien cun el. El fuva in dils emprems cussadents ed ha era gidau la soras, fagend cumissiuns ni rimnond massa gasettas veglias per saver vender e dar giu il recav allas soras. Tgi fagess quei aunc oz? Sia veta ei stada in permanent survetsch als auters.

Ils onns vargan per nies defunct. El fuva cuntents ed haveva bien, tochen il di ch'el vegn tuccaus d'ina daguota dil cor. Paucs dis suenter, ils 17 da fevrier 1981, ha el surdaū si'olma al Scaffider. Dus dis pli tard ein sias restonzas terrestras vegnidias surdadas alla fossa benedida el bi santeria Sedrun. Ina baselgiada ha dau il davos comiau ed accumpignau el agl ultim ruaus. Leu spetga el silla gloriosa levada. Segner, dai ad el ed a tuts nos cars defuncts la glisch perpetna. RIP. G.F.